

MARKINA-XEMEIN. Ekologistek derrigorrezkoa ikusten dabe naturearen babesaren ziurtatzea

Garapen orekatuaren alde

Ekozainek alegazinoa aurkeztu deutso industrialdean egindako lur izendapen aldaketeari

Lore Bengoetxea |

Markina-Xemeingo Ekozain talde ekologistek alegazinoa aurkeztu dau Udalak Kareaga industrialdean lurren izendapena aldatzeko hartutako erabagiaren kontra. Ekozainekoen berbetan, «industrialdearen garapena naturearen babesagaz bat etorri behar da».

Kareaga industrialdearen garapenaren bigarren fasea egin ahal izateko, hariztia egoan lekuko lurak industrialak izatera pasau dira. Erabagiagaz gora jo dau Ekozainek, alegazinoak aurkezteko zabaldu dan hilabeteke epearen barruan, Karmelo Jaio taldekideak esan dauenez.

«Industrialdea garatzeko derrigorrezkoa da natura babestea», adierazo dau Jaiok. Dinoanez, natura zaintzen daben arauak egon badagoz. «Administratzaioak bete egin beharko leukez, eta danon irudi izan, baina Udala ez da gai izan bateragarritasun hori topetako».

Gernika-Markina iraganbidearen ganean Aldundiak egindako txostenagaz bat datoz. Helburu honek jasoten ditu: espezieen ustiapen jarraikia eta ekosistemea bermatzea, eta lehengora bihurtu eta hobetzea; ekosistema naturalen eta paisajearen bariedadea eta ezaugarriak zaindu eta babestea; eta landaretzea zaintzea, batez be basoak eta erreka baztarrak.

Hariztia babestuta egoala jasoten dauen txostena eskatu deusie Aldundiari. «Urregarai SLri zigorra ipiniko deusiela erantzun deuskue, baina hariztia babesteko neurriak hartuko

dituenik ez dau esaten», argitu dau.

Proposamenak

Kareagako hariztia zelan gelditu zan ikusita, proposamen batzuk egin ditue, «industria garapena eta naturearen zaintzea bateragarri izan daiezan». Batetik, hariztia egoan lekuko landalur kalifikazinoa lehengo moduan mantentzea eskatu dabe, hau da, baserri lurak izaten jarraitu daiala; bestetik, basoa berreskuratzea, eta horrek eragindako gastuak Urregarai SLren kontura izatea;

eta, hirugarren, Udalak espazio hori erostea eta promotoreei futbol zelaian eregiteko eskubiak emotea.

«Planteamendua logikoa da, inguruaren ezaugarriekin bat datorrena, oraindino gehiago kontuan hartuta Kareagako kirol guneak behin-behineko izaerea daukana», dino Jaiok. Ekozainekoaren ustez, «leku horretan, gaur egun, anarkia hutsa dago lurraren antolaketari jagokonez. Toki berean kirolestarako, baserri jardueratarako eta industriarako diran lurak batzen dira».

Alegazinoa sartuta, futbol zelaiarentzat kokapen barria bilatzeko prozesua bizkortu egin nahi dabe, «bestela be markinarrek leku aproposagoa emotea eskatzen dabe eta. Berrantolaketa egokia egin ezkerro, herrira ekarriko litzateke», adierazo dau ekologistek. Aldaketa honek eta Kareagan garatu nahi dan industrialdea bat datoz bere ustez. «Ganera, hariztia berreskuratzeak inguru horretan astialdiagaz lotuta egin nahi daben gunea edertzea ekarriko leuke», nabarmendu dau Karmelo Jaiok.



NEKANE AKARREGI

Ekozainek Kareaga eta inguruak «ondo» berrantolatzeko proposamenak egin ditu.

LEKEITIO. Ondarroak be hartuko dau parte

Resurreccion Maria de Azkue ikastoleak antolatuko dau 2003ko Ibilaldia

L.B. |

Lekeition egingo da 2003ko Ibilaldia. Holan erabagi eben joan dan asteen Bizkaiko Ikastolen Alkarteko Artezkaritzearen batzarrean. Beharra ondarrutarrekin batera egingo dabe.

Ikastolen aldeko ekitaldia 1983an ospatu zan lehenengoz Lekeition. Handik hamar urtera, Ondarroako Zubi Zahar

ikastoleak hartu eban ardurea, ikastetxearen 25. urteurrenaren barruan, eta lekeitiarrak izan ziztuan laguntzen.

Datorren urtean Lekeition izango dan ekitaldian be alkarregaz egingo dabe beharra herri bietako ikastolek. Gurasoak eta irakasleak laster hasiko dira 2003ko ekitaldiaren inguruan ekimenak prestatzen. «Behar asko dago egiteko», dinoe.

AGENDA

BERRIATU

Berzikletako ontziak: Udaletxean zamarrak eta plastikoak bereizteko ontzi bereziak banatzen dihardue.

EHNA eskatzeko aukerea: Euskal Herriko Nortasun Agiria egin nahi dabenek apirilaren 15era orduko egin behar dabe eskaerea. Argazki bi eta bankuko kontu zenbakia eroan behar dira. Beste gauza guztiak Udaletxean bertan egingo deusiez.

LEKEITIO

Behargintza: Lekeitioko Udalak administraria behar dau Behargintza bulegoan beharra egiteko. Gitxienez, Lanbide Heziketako bigarren maila eukitea eskatzen dabe. Izena apirilaren 8rako emon behar da.

MARKINA-XEMEIN

Mendi urteerea: Ipurbeltz taldeak Aralarren mendi urteerea eta bazkaria antolatu dauz hilaren 24rako. Izena Rosi jatetxean emon behar da.

ONDARROA

Eskolarteko olinpiadak: Lea-Artibaiko Amankomunazgoak antolatuta, eskolarteko XIII. olinpiadak izango dira gaurtik aurrera Ondarroan. Gaur, DBH 1 eta DBH 2ko ikasleek alkar ezagutu eta hainbat kirol egingo ditue.

Tanborradea: Bagilaren 23rako euskal selekzioaren aldeko tanborradea antolatu dabe. Izena ikastetxeetan emon behar da, hilaren 15a baino lehen. Entsalaiak 19an izango dira.

Astilleruko aparkalekua: Izena emoteko epea hilaren 15era arte egongo da zabalik.

LAGURAEAN

ONDARROA

Ume, gazte eta famili hezkuntzako esku-hartze egitaraua aztertuko dabe

Gaurko Udalbatzarrean, Lea-Artibaiko Amankomunazgoak aurkeztu dauen ume, gazte eta famili hezkuntzako esku-hartze egitaraua aztertuko dabe. Beste alde batetik, mozinoak euki-ko ditue esku artean. Beste gauza batzuen artean, Euskal Herriarrok taldeak presoan aldeko baraualdia eta itxialdia egitea proposatuko dau Udaletxean, astebururako. Gaurko batzarra 19:30ean izango da.

ETB Andra Mari elizan egongo da Aste Santuan

Euskal telebistako kamarak Andra Mari eliza nagusian izango dira Aste Santuan. Jakinarazo dabenez, egun eta bariku santuko meza nagusietako irudiak hartuko ditue, eta baita Pazko domeka eguerdiko mezea be. Elizkizunetan, elizako koroak eta Antiguako Ama abesbatzak kantauko dabe.

ETXEBARRIA

'Zuberoa garatzen' proiektuaren aurkezpene egingo dabe

Bihar berbaldia izango da Etxebarrin, Udalbiltzak Zuberoa garatzen izenagaz bultzatzen daben proiektua aurkezteko. Bertan, Udalbiltzako ordezkari bat egongo da, asmoen ganean etxebarritarrek euki ahal dituen zalan-tzak argitzeko. Ekitaldia Udaletxeko batzar gelan izango da, 21:00etatik aurrera. Antolatzailea Zuberoa Garatzen topagunea da.

LEKEITIO

Kepa Junkeraren emonaldirako sarrerak saltzen jarri ditue

Lekeitioko Udalak hile honetarako antolatu dauen ekimenen barruan, Kepa Junkeraren kontzertua dago. Artistek Maren diskoaren aurkezpene egingo dau hilaren 30ean Santi Brouard kiroldegian, 22:00etan. Bertan, lekeitiarrak eta Aste Santuan hara joandako bisitariak batuko dira. Sarrerak leku honeetan erosi leitezke: Udaletxean, Aralde liburu denda eta Ioar, Guzurmen-di eta Tia Fran tabernetan. Aurretik erosi ezkerro, zortzi euro ordaindu behar dira, eta bertan, hamar.